



Selasa, 7 September 2021
Ogen: Esekiel 14:21-23



Cukup Alasan Guna Ngukum



Ukumen man kalak salah situhuna ilitken gelahna kerina jelma nggeluh alu tertib ras jera bas salahna nari. Ukumen labo harus icidahken alu kekerasen, tapi megati Ukumen e ibahan alu keras gelahna mereken efek jera. Tapi labo kerina kesalahen arus idungi alu ukumen. Tapi adi ipedalan kin ukumen e ola semena-mena ntaah pe ate-ate saja. Ukum arus setimpal ras kesalahenna. Kuh min alasenta guna ngukum gelah ukumen e la gia rusur tapi mengena man singaloken ukumen e ras mpelimbarui geluhna.

Tuhan arah nabi Ezekiel nuduhkan pengukumen man bangsa Israel. Engkai maka bage, sabap nggo kuh alasen Tuhan guna ngukum bangsa e. Tuhan e dem perkuah ate IA la mesunah merawa janah dem pengalemi i bas IA. Enggo erbage-bage cara Tuhan mpersingeti bangsa e, ngalemi bangsa e tapi reh ganjangna ukurna. Enggo piga-piga kali persingeti Dibata bangsa e, tapi la jera-jera, isembahna berhala janah mersik ukurna janah banci akapna pulahina bana. *Nehenlah uga jahatna* ia, nina Tuhan man Ezekiel adi kune lit bangsa Israel si puluh bas ukumen. Kepeken labo cakap penyesalen tapi tempa-tempa kepulahenna pe ialokenna perbahan bujur akapna bana. Emaka ipedabuh Tuhan ukumen e, eme kelihen, perang, rubia-rubia si merawa ras perang. Ise pe la banci puluh adi la kin arah kiniteken ras pertobatan man Tuhan.

Senina Moria, keleng ate Tuhan eme keleng ate si mbagesna. Labo minter iukumna kita adi lit salahta, buen nge keleng ateNa asa pernembekh ateNa. Cukup nge alasen Tuhan, maka ipedabuhna ukumen. Jaga dirinta. Bagepe si nen cara Tuhan erdahin mpehuliken geluhta, kita ola mintersa merawa ras ngukum adi lit si salah man banta. Cukuplah alasenna maka sisehken pengukumen man kalak si ersalah, man dirinta, anak, keluarga bagepe kalak sideban.